

Te Nukuhanga ki Aotea me ngā Tikanga o te Mōana

I hoki mai au ki Aotea, ki Papatapu, i haria mai au e taku whaea ki Papatapu, ki tērā taha o te moana nei, kei reira hoki tana teina e noho ana, i whakahokia mai au e ia ki reira, ka whakaaro au, aw, kia kino mai tēnei whenua, kua ngaro au ki whea rā, heoi anō te ora o taku ngākau, kua noho au i te taha moana, ka noho mātou ko taku whaea ka kī atu au pēwhea ai te hopu ika, ka kī mai he whakatū pāpā, ā pēhea tērā mahi, kāore hoki au i te mōhio he aha ngā mahi kai moana, kātahi ia ka kī mai oo haria ai te kupenga, e hine, he mahi nui, kātahi au ka kī atu he pai noa iho māku e mahi, ka mate tāua i te mahi, e pai ana māku e mahi, māu ahau e tohutohu, a, ka whakaae taku whaea i tētehi rangi, kātahi māua ka heke iho e iri ana te kupenga, e tau ana te waka, he waka Māori tūturu nā tana taimaiti i mahi tēnei waka, ko Te Wehi te ingoa o te waka o tana tamaiti, ā ka tangohia iho, ko te kupenga kei runga i te waka, ngā pou me ngētehi pou ririki anō

e kī ana he tī rau, a ka pana atu i tō māua waka ki roto i te awa itiiti nei, ka pana haere a kua tae ki te wāhi hei whakatūnga i te kupenga, kātahi ka kī mai, na kua mahi tāua ināiane kua

whakatū ngā pou nei, me pēhea te whakatū ā me tīmata mai i kō, ka haere mai, ka huri haere mai, ka huri haere mai, te kaha o taku hiahia ki tērā mahi, māku katoa ēnā mahi e mahi, ka tahuri au ki te pou haere i ngā pou rā, ka mutu ka kī mai, na tōia atu tā tāua kupenga ki reira, nā ka herehere haere mai ā runga ki ngā pou, a mei anō, ka mahi mai, ka tutuki, a ka kī ka herehere haere ā raro, ka mutu kātahi ka kī mai, tītia ngā tī rau, na ko tērā rākau he whēnei, he roa tētehi taha, he poto tētehi taha, he tīrau tēnā ā ka tītia hoki te, ki te mea o te kupenga, ka tītia ki roto i te paru, na kua kore e tārewa kia kore ngā ika e puta, ā ka oti meee te ora o taku ngākau kua kite au i tērā mahi, ā ka hoki aa ka pō ka moe, me taku whakaaro tonu ka tere maranga tonu au i te ata kia kite au i ngā ika, ai i te ata anō kāre anō i tino māranga rawa kua maranga au, kāre au i whakaara atu i aku hoa, i tō matou whaea e ka heke au ki te tai, kāre hoki e matara, taku heke atu kua kite au i te ika e haere ana kaaa wehi au ka haere au ki rāhaki ki te titiro atu, kua kore au e tae ki te haere atu,

Nā te ohonga ake o taku whaea kātahi ka ringi mai ki tana teina i tāwāhi mai, ko Rangi Kuini te ingoa o tērā, ko Parewhakaruku te ingoa o tēnei o aku whaea, e kei raro nei te neti nei kua maranga noa atu te wahine nei, kua tae noa atu ki reira, kāre e roa kua kite au i tērā e haere mai ana i runga i tana hōiho ki te tahatika o te moana e takoto mai rā, aa kei uta au e titiro ana ki ngā ika, kore rawa au e tata atu kei werohia au e te whaea, he rongo kōrero noa iho te rongo, kua nui noa atu te wehi, haere tonu mai tērā o aku whaea kua tuku ki raro i tana hōiho, kua haere atu ki te tahatika nā, ahau kua haere mai kua peke ki roto i te wai, kāore anō hoki i mimiti rawa te tai, kaaa tīmata te whiu ika kei reira au e titiro atu ana kua kore rawa au e tata atu, i taku wehi hoki,